

四庫全書

集部

# 欽定四庫全書

集部  
午亭文編卷一至三

詳校官庶吉士臣汪彥博

助教臣常循覆勘

總校官庶吉士臣倉聖脉

校對官中書臣牛稔文

謄錄監生臣許紹錦

欽定四庫全書

集部七

午亭文編

別集類六

國朝

提要

臣等謹案午亭文編五十卷

國朝陳廷敬撰廷敬字子端號說巖澤州人順治戊戌進士改庶吉士授檢討本名敬以是科有兩陳敬奉

旨增廷字官至大學士謚文貞嘗著尊聞堂集八十

卷晚年手定為此編其門人侯官林佶繕寫  
付雕午亭為陳氏陽城別業因水經注沁水  
逕午壁亭而名所謂午亭山村也集中詩二  
十卷禠著四卷經解四卷奏疏序記及各體  
文共二十卷杜律詩話二卷廷敬家故多藏  
書少時即能縱觀喜為詩歌門徑宗仰少陵  
頗不與王士禎相合而士禎甚奇其詩所為  
古文汪琬見而大異之遂肆力焉其生平回

翔館閣遭際

昌期膺受非常之

知遇出入

禁闈幾四十年正值

國家文運昌隆之時而廷敬以淵雅之才從容簪

筆典司文章得與海內名流以咏歌鼓吹為

職業故其著述大抵和平深厚當時咸以大

手筆推之卷首有廷敬自序謂于汪王不苟

雷同然其詩文實各自成家分途競爽雖就其才力之所及蹊徑不無稍殊而要為和聲以鳴盛則固無異軌也乾隆四十三年三月恭校上

總纂官

臣紀昀

陸錫熊

孫士毅

總校官

臣陸

費

墀

午亭文編原序

吾六七歲從塾師受句讀見左氏尚書傳喜而竊誦之  
雖訶其不急弗顧也後每見古文輒喜誦之家故多書  
世父道莊府君有文為庶吏以御史視江南學政皎皎  
潔嚴踰太行而北也橐中蕭然不足具芻糧顧獨載書  
卷以歸詒吾兄庶常君庶常尤好古文先太宰公命余  
從之學乃盡發其新舊書得縱觀焉為詩誥古文辭年  
二十釋褐登朝優游詞館與二三同學獨多為詩新城

王阮亭方有高名吾詩不與之合王奇吾詩益因以自負然卒亦不求與之合非苟求異其才質使然也其間亦復稍稍為古文以自娛長洲汪鈍翁見而大異之召文故世父所知士吾感汪言遂肆力於古文若自有得焉後

召見殿中余言貽上

詔求文學之士余言古文兩人皆官翰林益礮礪切靡為學以求進於道汪未久告歸吳中王今且為名臣而



余隤然將老矣始吾於汪王顧頗自得不欲苟雷同豈  
惟才質乎將以力之所近者求至於吾道焉已耳古之  
為文者非以其辭期於明道也故或即道以為文或因  
文以見道其致一其勞逸殊也見今世有有道而能文  
如二子者與吾忻慕焉頃理舊藁因自叙其為學之大  
意如此澤州陳廷敬序

欽定四庫全書

原序

欽定四庫全書

午亭文編卷一

大學士陳廷敬撰

樂府

朝會燕饗樂章十四篇

并序

康熙二十年十二月定饗祀樂章

詔禮部翰林院議明年正月尚書

臣帥顏保學士

臣陳

廷敬等集議言

郊

廟樂章

世祖章皇帝所親定臣等不敢變易獨朝會燕饗沿習前明典章未備祈

勅下臣等考古樂之原定聲律之節作為雅歌用昭盛美

詔曰可於是禮臣曰此詞臣職也以屬臣廷敬臣待臯掌院事乃集諸詞臣謂之曰廷敬材能淺薄不足以光

制述之事樂歌之作無如公等為宜諸詞臣固以讓臣  
臣不得辭嘗考古樂之備者莫如詩朝會之樂正大雅  
之詩是也燕饗之樂正小雅之詩是也漢以來失雅詩  
之義魏得杜夔所傳古樂四篇遂倣鹿鳴作於赫篇以  
祀武帝倣騶虞作巍巍篇以祀文帝倣文王作洋洋篇  
以祀明帝則直以雅為頌且亂以風又烏能得雅詩正  
義乎晉以後去古雖遠間存雅詩之遺逮梁武帝南北  
郊明堂太廟三朝悉名為雅則是頌聲亡而正雅之用

混也唐分雅俗二部然所謂雅者以別俗之名耳其實  
皆俗樂也宋郊廟之樂曰安其義亦猶唐曰和隋曰夏  
也而朝會燕饗之樂亦以安名詞皆短歌其亦猶有雅  
詩之遺意者與惟六變之曲聲調靡曼實皆五字長句  
也及乎明之樂無有足觀者矣我

朝

郊

廟之樂名曰平令臣所撰樂章實先定名義

朝會

皇帝升坐曰隆平還宮曰顯平

萬壽升坐曰乾平還宮曰泰平元旦升坐曰元平還宮  
曰和平冬至升坐曰遂平還宮曰允平小宴升坐曰協  
平還宮曰興平

郊祀導迎曰祐平

廟祀導迎曰禧平謝見曰慶平外藩謝見曰治平雖略  
倣乎宋而要皆以雅詩之義為準至於六變之曲則聚

無取焉臣又嘗誦正雅朝會之詩曰無念爾祖曰無遏爾躬燕饗之詩曰視民不佻曰徧為爾德罔不盡其反覆丁寧之意而不專主乎鋪張揚厲之辭臣雖愚陋竊取此義故十四章之中所以陳述天命之不易大業之艱難者雖不能盡其辭亦略舉其指焉臣不任皇恐頓首謹序

朝會

皇帝升坐中和韶樂作奏隆平之章



赫矣天鑒眷求惟聖保右我

清既集有命假樂大君天位以正蒞下有容監于萬方  
念茲崇功駿命孔常

右隆平之章十句

皇帝還宮中和韶樂作奏顯平之章

於昭

三后誕降世德亶亶我

皇克艱袞職治定功成中和建極龍飛在天鳳儀于庭

式奏王夏垂億萬齡

右顯平之章十句

萬壽

皇帝升坐中和韶樂作奏乾平之章

二儀清寧三辰順則維

帝凝命函冒區域仁恩廣覃訖于動植久道化成隆功

駿德

聖人多壽年世萬億

右乾平之章十句

皇帝還宮中和韶樂作奏泰平之章

鑒觀惟德丕命惟

皇肇茲壽域薄海要荒物性育茂謠俗樂康冠帶之國  
望斗辨方曰惟萬年同于昊蒼

右泰平之章十句

元旦

皇帝升坐中和韶樂作奏元平之章

於穆

元后敬授人時四始和令三陽肇基鸞路倉龍載青其  
旂迎氣布德百工允釐行慶施惠及我烝黎

右元平之章十句

皇帝還宮中和韶樂作奏和平之章

有奕元會

天子穆穆踟躕羣公至自九服正朔所加海外臣僕率  
土惠懷萬民子育千齡億祀永綏第祿

右和平之章十句

冬至

皇帝升坐中和韶樂作奏遂平之章

乾符在握道轉鴻鈞天心見復物始資元景長舜日紀  
協堯春玉琯應瑞寶歷肇新衆正在位輔翼

一人

右遂平之章十句

皇帝還宮中和韶樂作奏允平之章

皇帝在宥一陽斯溥淵默臨朝天職修舉君子道長駢  
珪聯組占日書雲產祥降嘏宜暘而暘宜雨而雨

右允平之章十句

小宴

皇帝升坐丹陛大樂作奏協平之章

聖皇莅止穆穆皇皇百爾卿士章服斯光吹笙鼓琴式  
燕嘉賓萬福既同歸美

一人

右協平之章八句

皇帝還宮丹陛大樂作奏興平之章

湛湛露零維豐之芑猗與在公思皇多士宴示慈惠以洽百禮敬慎威儀福祿來只

右興平之章八句

郊祀導迎樂作奏祐平之章

皇天有命

列聖承之我

后配德文匡武綏海隅寧謚神靈宴娛於萬斯年流慶  
降釐

右祐平之章八句

廟祀導迎樂作奏禧平之章

於

皇紹烈累熙重光銷鑠羣慝我武奮揚肅肅清廟戕戕  
奉璋奠鬯斯馨祚命無疆

右禧平之章八句



謝見丹陛大樂作奏慶平之章

皇覆萬寓品物咸亨九賓在列百譯輸誠濟濟卿士式  
造在庭

帝仁如天

帝明如日親賢任能愛民育物禮備樂成聲教四訖

右慶平之章十二句

外藩謝見丹陛大樂作奏治平之章

天盡所覆以畀我

清我德配命涵濡羣生萬國蹈舞來享來庭俟俟傳傳  
視彼干戚

天威式臨其儀不忒

右治平之章十句

獻平滇雅表一首

臣廷敬嘗誦詩見大小雅六月采芑江漢常武皆言周  
宣王南征北伐興治撥亂以定四方平天下之功臣嘗  
竊歎以為如詩所載可謂盛哉後讀柳宗元平淮雅表

言宣王之形容與其輔佐由今望之若神人然直以雅之故也臣按宗元意以謂宣王定四方平天下苟非其臣尹吉甫召穆公輩作為雅詩傳之于今今雖欲望宣王之形容及其輔佐之盛其道無從而宣王定四方平天下之功亦不能赫赫必傳於後世烏虜宣王之功後罕匹矣迺推較往古驗之方今功德盛隆邁于周雅而適無有尹吉甫召穆公其人播為聲詩彰大其道其何以昭宣治績丕揚成功傳之於後然則雅之作厥義重

金匱要略卷一  
卷一  
矣哉臣伏見

皇上文武神聖天錫智勇光宅天下奠安八荒仁威所  
加率土內外罔不讐服乃有孽臣潛伏伺釁煽搆禍亂  
震搖我疆圉俶擾我人民

皇上赫然一怒命將授鉞頃年以來定秦隴降閩海平  
兩粵收巴蜀天兵所向次第告捷而滇逆竊據南楚實  
為亂首

皇上神機中斷指授規略埽清湖湘進克黔南破堅摧

險直薄滇城之下師久不解

朝旨督進軍麾一動氛祲消滅皆由

廟堂動罔遺策是以疆場舉必有功海外怖駭臣黎懽

躍太平之會實當今日臣嘗計滇逆之興亂干誅也耗

糜帑賦私籍甲兵招納亡命擅行威福尾大不掉反勢

已成正如漢削七國唐縱藩鎮蚤發則易圖優容則難

拔故三藩之事

聖慮先覺不辭大創之勞永奠萬年之治臣所謂功德

過於宣王而大雅不作不勝惑焉顧朝臣至多豈無尹  
吉甫名穆公其人者以颺

大清之盛美於無窮

臣

獨何人敢專斯事然

臣

備員法

從尤以文章為職業不得以能薄材謏不足以自効為  
解謹撰平滇雅三篇再拜以獻

臣

廷敬誠惶誠恐稽首  
頓首謹言

平滇雅三篇

并序

岳湖逐寇也

岳湖洋洋我武洸洸謂南有藩無敢撼我疆岳湖滔滔  
我武颺颺謂南有藩無敢闕我郊

一章

我疆大矣我圉溢矣牙孽其間竦棘合蝟昔我南藩化  
為異類

二章

帝曰大君以覆以載推食以食解衣以衣遷之善地勿  
剪勿拔

三章

彼惟狂昏狡焉生心肆為誅首啓戎于南如螳奮臂如  
蚋決眚首仰臆張如豕斯驚

四章

惟

帝咨嗟惠威是崇薄往禽之孰佐予功予矜下民救此  
一方取其殘凶是類是造禍于臨衝楛矢敦弓

五章

我弓我矢靡旌摩壘兵無遺鏃耕無失耜天塹茫茫限  
此江水既斷其趾且斬其類

六章

盜負險阻距躍躍踉跄飛饑獻羽翅以張候在太白占

于天狼我涇我隴是震是驚

七章

維彼閩粵波盪海垠



帝屢下顧哀此墊昏盜往連結倚以父母乃餌乃誘乃

為盜守

八章

帝援天矛鍛羽截鱗嶺海革面蒙羞來臣禽虺于威柔

肌于恩盜失厥助飛魄殞命

九章

老雄野死梟雛棲棲巢湖飲江傾搖于波爾居艷琬我

步逶遲大袒高驤賊馬遯逃

十章

洞庭湯湯岳陽峨峨載驅載馳爰拔厥家

十一章

惟人歸德惟

帝之謨窮經窟宅是剪是屠我武燁燁式廓鬼區百蠻

萬國侯我來蘇

十二章

岳湖十有二章八章章八句二章章六句一章

十句一章四句

湘東克衡也衡盜倚為巢克之武功將成也

師踰于江于湘之東師如雷馮震衡岳以尊一夫為逆

多方則病播虐抗有德我人斯奮卒歸厥命

一章

歸命伊何衡人之災衡盜所家追奔逐北犀甲雕戈虎

旂龍節

天威所加

二章

帝臣如虎

帝師軀武烈烈旃旌淵淵金鼓嶷嶷綏章嘽嘽戎路莫

我敢拒

三章

右刈武陵左埽星沙磨崖岫嶺我功孔嘉戎馬晨服候

峰夕遮剗絕惡本敢遺萌芽

四章

其恃楓木其恃辰龍震之拔之自西自東陟嶺踰徽于

山于川遠招邇歸囚豪解顏

五章

東西合師進次于沅孽童日蹙怙尤忍頑左擣其虛右  
攻其堅載闢載袞會于中權

六章

既克于沅沅人嬰嬰如日之昇如霖遇晞以肉其枯以  
勅其羸式歌且舞以樂我師

七章

南訖羅施來迎壺漿鳴鞀銅鼓洗兵盤江彼寇輿屍晝  
匿宵奔滇人荒茶待我于門

八章

凡此滇功惟斷乃成古者推轂柵外以行今者決勝一秉

廟庭孰是遺孽而厯

睿明九章

師徒渾渾漸集于滇惟

天威式監官臣恪守乃獲其醜保大定功流聲焉窮

十章

湘東十章一章九句三章章七句六章章八句

滇池盜伏于滇師受

聖策平之武功成也

滇池洶洶

帝乃平之匪彼元戎惟

帝之功高居北極洞視下方惟仁智勇克靖萬邦

一章

帝命臣塔汝從西粵急擣其窟塔拜受

命銜枚束刃環滇其來龍駭鵬騫軍聲轟然如墜自天

二章

帝命臣里汝從巴蜀橫剪側入里拜受

命量沙追薦有疾其驅無暴我邦踣柵趾壘言壁其東

三章

帝命臣泰汝從黔趨惟此蝨賊數載曠誅汝將士用命  
賊其敢逋泰拜受

命于

皇之訓

四章

我旄我旗于苗于蠻度幕輕留彌險敵關奪其阻隘掀  
其籬藩獸窮負嵎我師固以完

五章

帝命我師勢為犄角麾城擻邑萬里手握維彼馘靡敢  
抗喬嶽維彼萌枿敢傲霜電

六章

彼枿繁矣于焉蟠根雨露既濡忘

帝力之勤

聖人神武施設芟夷斲彼梟驚張我熊螭

七章

僚鐔批亢下甲陷堅箕張翼舒合圍于原獸窮于阱人

或獸哀快彼凶醜覆卵毀胎

八章

帝曰吁嗟勞我人師日費百萬大農不支滇人望拯如

舖療饑載礪載攻

天策攸宜

九章



孟冬月杪師薄于城降旂夕豎逆駭縱橫林野塗腦郵

驛遞顱滇人歌舞于屋于衢

十章

夜半捷來

天心惻楚閔憐下氓罹此荼苦我將我師于野暴露布

惠醕功急疾如火

十一章

于

廟于

郊其儀孔熾華俎脂牲永言昭事都人士女白麥黃童

歡呀噓笑祝我

聖躬

十二章

帝曰歸來予開明堂制禮興樂登賢拔良孩養無告施厚仁滂熙我庶績綱舉目張永萬斯年率由不忘

十三章

滇池十三章十章章八句二章章九句一章十

句

北征大捷功成振旅凱歌二十首

并序

日者

皇上北顧邊陲永惟戡定

聖心獨斷決策親征羣臣震悚表請遣命將士毋煩

車駕遠行蒙

詔旨開喻弗允臣廷敬伏念

皇上為天下勤勞歷涉沙磧躬莅戰陣而臣下晏然安處其何以自寧於時奏乞扈從仰蒙

天心矜憐謂臣年力就衰

恩旨下頒臣恭聽之頃不覺涕零伏念臣以衰薄不克

備戎行効職役今者

天戈一指兇醜破滅朝至暮捷功成漏刻敷天率土罔

不懼忻

臣受

恩高厚無所報稱惟謹述文句以導揚

盛德於萬一而

臣

愧非其才惶恐踰時復不能自己

臣

伏見

皇上覆育四海撫有萬邦東西朔南懷仁歸義聲教所  
通遐荒異域侯王君長稽顙闕廷至若

聖略

天威武功丕顯

御極以來平察哈爾定三逆取臺灣服倭羅斯收喀爾喀埽蕩邊塵廓清疆宇固已烜赫炳耀亘古今而昭天壤弘恢服而奠生民矣迺魯特噶爾丹者違我德化自絕生成梟獍猖狂侵我屬國洵法所必討師出有名皇上躬御六龍親護諸將驅鷹揚螭虎之士臨大荒盡窮幕風行電激聲震雷霆而天申顯佑百靈効順風雨

不驚水草應候時日吉良士馬利賴殲廿年逋誅之寇  
建萬世不拔之功此誠開闢迄今簡冊所宣布宇宙所  
流傳

聖績神猷曠古無匹者也

臣雖不能侍

行幄至營壘親見剪獮屠戎之盛猶欲彤之篇翰製為  
詠歌以敬颺我九伐之光明亦臣之至幸也謹按王師  
大獻奏愷樂周禮始著其義釋者曰愷兵樂也司馬法  
云得意則愷樂所以示喜也漢有短簫饒歌魏克官渡

晉征遼東皆製歌曲被之聲樂凡以諷道戰伐之事而  
申寫三軍凱樂之情唐柳宗元有饒歌鼓吹曲宋有姜  
夔聖宋饒歌曲皆其所自作以進之朝廷此皆古體詩  
也然自岑參劉禹錫諸人已自以今體為凱歌聲調具  
有風雅之遺臣今竊取宗元夔進詩之義詩用參禹錫  
之體作北征大捷功成振旅凱歌二十首臣目雖昏眊  
勉自繕寫字畫蕪穢仰塵

慈覽臣不任榮忭不任兢惕之至

皇家本意為銷兵刻日邊沙一戰清九伐元從

天子出翠華親總六師行

聞道神功斷乃成盈庭連表諫

親征誰知

聖算高千古一著戎衣定太平

蕭蕭龍笛出關聲雲旆晴翻朔吹輕十萬羽林眠夜月

迴看北斗挂南營

汗馬河源飲欲乾夕陽萬竈冷炊烟



玉鞭應有山靈護指處三軍見井泉

宜暘時節草芊芊便是窮荒大有年風伯雨師齊効順可知

聖德格皇天

算得西營計日糧

玉音纔罷見封章懸知宿飽三軍士金革銜恩在戰場  
祇為生民事遠征前軍馬上捷書成絲綸簿載蛟龍筆  
批答人知出塞情

月上旌門映細旄旄頭影落斷狼烟尚衣高鎖黃金甲

長記龍韜決勝年

開拓邊疆四接天  
職方環海浩無邊  
黃雲萬疊青霄外  
收取山河直到燕

苗格于今正七旬  
兩階干羽更森森  
全收瀚海為靈囿  
要置天山列禁林

幕南庭北接

王畿一道清塵捷  
騎飛四十九藩先  
拜舞朔天生養在  
皇威

漠漠雲隨露布生人知天意為

親征朝衣半溼蒼龍雨點點分明淨洗兵

迴軍吹角罷連營疊鼓風多破陣聲寫入

天朝新樂府流傳奕世見昇平

武功文德並崔巍

聖藻篇章每獨裁萬古燕然留片石磨崖共仰勒銘迴  
春歸苑樹別長安六月龍沙草露漙邊柳千條花萬朵  
一時留助凱歌歡

今來楊柳正依依昔去關山雨雪霏魚海輕陰猶未散  
五雲常繞六龍飛

天廐驍騰汗血斑嘶風別去籥雲還瓜時不遣黃龍戍  
苜蓿青青意自閒

九邊萬里抱神京地盡遙荒戍不驚夜夜關門開曉月  
天家本不用長城

劍花弓月拂雲還歸路邊庭障塞聞數首新詞翻鼓吹  
凱歌聲裏舊關山

帝德天威日正中九賓王享百蠻通炎黃以降多青史  
萬乘臨戎第一功

謹獻

大駕三臨沙漠

親平僭逆

聖武雅表一首

臣  
廷敬伏見我

皇上撫御萬方盡有四海內外

恩德鴻龐聲教遐暨比年以來天下宴安而推溯武功  
所由戡定則誅三逆以平滇黔粵閩楚蜀外闢察哈爾  
臺灣倭羅斯喀爾喀之地幅員之廣超越前古治化之  
隆巍煥莫並今

神謀獨斷

聖武布昭伐罪救民躬行天討大憝授首餘黨歸誠厄  
魯特全國蕩平捷書至日雷動嵩呼中外臣士閭巷小  
民罔不歡欣忭慶蓋是時

車駕親征馳驅戎壘凡三出朔塞矣當

天衷決策初御六師中朝悚慄僚庶攀留臣以年力就  
哀蒙

恩矜憐弗允扈從之請自是以來祇遵成

命不敢再瀆

天慈而違離

聖顏日夕虔惕伏念

皇上為天下掃除殘賊為邊疆永致廓清跋歷窮荒經

涉寒暑勤勞軍務旰食宵興而臣子安居略無寸効今已無事言念

國恩無所報稱猶欲俯竭愚誠撰擬文句敬賜

聖烈之無窮而臣媿鄙無學尋繹累日莫知所擇竊惟

自古帝王有功於天下其名聲彰著於後世者方策之所紀載金石之所刊錄聲詩之所流傳後之人覽其事而遐想其盛焉是以昭昭然若昨日事也然而其盛者亦不數數覩矣阪泉涿鹿以還古今稱善用兵者漢之



高帝唐之太宗皆自興事之始乘時搆會底於成功若我

皇上聖德而踐天位躬居大寶志切生民仁育羣倫義征不諛尊臨九重制勝萬里

天威所至攻戰多方撲滅兇殘蕩埽巢窟宿寇遺孽一朝頓除伏卅載之逋誅樹九邊之壯觀殲其渠魁降其支黨燧烽永息亭堠不施曠古難平之部落盡為臣僕普天所有之土宇咸入版圖自此寰海清平兆民樂業

集萬年之鴻慶成千古之大功臣仰窺

聖烈俯稽往古漢祖唐宗起於側陋角一時之雄乘末  
流之敝雖精於兵事而我

皇上文謨武烈聖德神功實遠邁前徽矣若夫書冊所  
載既有天下優游宮禁之中不過遣將興師身居其逸  
坐收其效間有親征如宋藝祖之北伐明成祖之行邊  
宋則失利明則鮮功是以方策金石聲詩之文仿佛擬  
比可導揚盛美之萬一者蓋徬徨震悼而莫知所擇焉

求之於詩惟周宣王身為天子南征北伐有定天下之功雖淮夷諸小敵未為甚難平之寇而玁狁之伐止於太原皆命臣士以行事蹟殊不類然其臣詠歌之詞孔子有取焉唐臣柳宗元本其義作唐雅臣於嚮者滇逆之平不度固陋竊取其義進平滇雅曾上塵

聖覽今臣伏思後世饒歌鼓吹之曲未足以盡聖武之形容仍依古體謹撰

大駕三臨沙漠

親平僭逆

聖武雅三篇繕錄以進臣之愚意固以敷宣人事之盛美而其義則歸本於天我

皇上即天也覆載照臨雷霆風雨天之所以為道栽培傾覆治亂侮亡

皇上之所以為功彼噶爾丹自外於覆載照臨之內干雷霆之誅絕風雨之澤蓋所謂逆天者亡也我

皇上天威所臨賊始則沙場糜敗妻孥磔屠繼則衆叛

親離孤雛就縛其卒也我

皇上親揮將士迫抵賊巢賊知逆天必誅飲藥自殺邇  
始訖終我

皇上馳驅萬里勞苦艱難若非

親征大舉必不克迅致膚功此人事也即天也至若晴  
暘以時靈泉表異水草應候百神致祥旋師之先甘雨  
灑郊飲至之日雲陰開霽臣僚擁道恭迎都人父老孺  
子辨香欣躍愜樂慶成

臣推本於天之義由茲益自信

馬臣不任榮幸歡忭之至

聖武雅三篇

并序

惟天初臨沙漠安邊靖寇破敵大捷行慶于民振  
旅還京武功盛也

惟天惟

帝惟

帝乃天盡天所覆我徼我邊何彼逆驚為我人患

帝自伐之往取其殘

一章

衆曰

至尊毋勞

萬乘我師武臣孰不恭命

帝曰吁哉自昔弔民如水斯溺如火斯焚

二章

帝謂卿士

朕必親往彼惡貫盈煽虐滋廣擣其腹心離其支黨安

我荒服除彼狙獪

三章

諏春吉日是類是宜

聖謨先定協于神祇既攻我車既秣我馬峙我糗糧于

塞之下

四章

六龍遄飛闕雲四開師行如山如霆如雷蠲租已賦民

有慶哉屬國謹呀

天子自來

五章

茫茫荒磧伐薪孔遐溼烟不爨萬竈以譁我軍之行晴

空洋洋雨師避道宜暘而暘

六章

帝減尚食哺我士飢飲我士渴朝斯暮斯野曠無衆何以為糜



玉鞭所指靈泉瀰瀰七章

無人之鄉絕轡之野五日窮追賊衆解瓦彼狂何知竄  
徙顛魄不謂

帝來初猶笑啞

八章

冠昏以驚聞

帝自將獸窮突奔心膽墮喪軍扼于途大殲巨創瀚海

塵揚天山簸蕩

九章

築顱于丘波血于河九州百蠻為鑒孔多燕然之山蒼

嶕嶢伐石紀功萬載不磨

十章

都人黃耆扶藹來迎饒吹所歌告武之成桑麻在郊民

熙以耕戎衣一著四海永清

十一章

惟天十有一章章八句

皇矣再臨沙漠相機宜撫降人安兵民武功再盛

也

皇矣

聖功邊氓孔安惟

帝念茲冀即于完自我來歸由暑訖寒旅師在野雨雪

其漫 一章

天初生人豈擇莠良

帝德好生并包八荒從化者存不龔者亡汝尚能來無

或汝戕 二章

汝家靡矣汝徒贅矣羈孤單棲云何嬉矣汝尚能來食

之衣之天無不禱天無不持 三章

怙終者誅國有明紀彼頑不悛盜我儲峙師進逐之原

野萬里皆我職方何奔何止

四章

皇命于廷是礪是攻拔本塞亂惟義之中

朕不親往邊人旻旻我怙我恃宜憚征行

五章

朔風蕭蕭捲我旆旒

翠華載臨儼涉我郊藩落老稚簞壺以勞

帝來撫我于險于遙

六章

或擁周道或控馬首

帝顏霽溫下拊以手如燠如春

恩語勤厚坐使來前薄饗其有七章

言幸師營言迫賊壘烜赫

天聲賊黨破徙其降如歸其趨如市來者既多惟恐後

至八章

帝待降人曰彼大辜汝則何罪懼彼毒荼致汝于鋒致

汝于屠其來汝拔爰止爰居九章

帝謂降人我黎我赤草枯于原冰堅于磧藹藹陽和于

疆于陌盡降其人大醜斯獲十章

我士我旅歲其云遷

帝念我人言歸言旋凱聲載路士女闐闐

帝威

帝德振古無前

十一章

皇矣十有一章章八句

武成三臨沙漠禽其孽子殲其渠兇餘黨歸命武

功大成也

武成自初三援天戈惟

皇之命神人以和長彼蟲螟奈此嘉禾既化其類胥顛

其窠

一章

載後載嚴式張我武雲旂飄翩日繞熊虎風颭烈烈揚  
于金鼓弧矢朱弓不殊干羽

二章

皇眷西土我理我疆于闕于塞于邊之牆于隴于畝于  
河之陽下民何幸近

天子光

三章

皇撫吾民以覆以載是幸是臨恩逾汪濊

帝來人歡

帝行人思六師所過言錫我釐

四章

帝行天中如日正車咨遣兩師以翼漠沙尅日並進毋  
謂遠遐角之倚之

天威所加

五章

爰陟爰止狼居胥山四顧藩部于川于原皆我在宥矜

茲彈丸如毒斯螫如爪斯牽

六章

彼梟日蹙孤雛棲棲我禽獮之檻致于畿人之無良不



保妻子惟汝之為求禍自爾

七章

我師日進言迫其巢卵傾翼折梟困以嗥腊斯焚斯不

復遠跳乃如之賊為戒茲昭

八章

戮尸于軍傳首于邊變容慄股孰敢不虔

皇赫斯怒遠人所觀如帶如礪如石之磐

九章

載馳載旋言歸凱樂于以慶成于

郊于

廟載沛

德音四方是告

帝開明堂萬邦畢照

十章

惟天同符以清以寧自此無事泰階永平惟

帝之功與天無極斯歲斯年于萬于億

十一章

武成十有一章章八句

南巡歌十二章

并序

聖駕親視河工宏恤民隱

恩膏廣沛遠邇同庥

臣

廷敬備員戶曹於今六易年所

每蒙

天語垂問郡國水旱年歲豐歉仰見我

皇上天覆四海子育兆民尊居九重慮周萬里無時不以黎庶為念無事不以仁愛為心茲以黃運兩河關漕輓之安危繫民生之休戚

乘輿臨厯指示規為

翠華所莅

皇澤覃敷

臣

所不及知者多矣以

臣

所領職事奉

明詔而宣德意者郵驛所傳源源靡已臣等謹循職守恭繹  
恩綸俯同官僚欣感

聖政惟我

皇上德盛功高仁深澤厚際天蟠地曠古振今生民以  
來所未有也臣等雖未獲與扈

踵之榮而實竊幸遭逢之盛每接

詔旨仰遵宣布傳示遐邇朝臣颺頌閭巷歡舞以及四  
遠之人無不手額稱慶僉曰

聖德厚矣至矣無以加矣吾曹何幸而生

聖人之世也

臣伏惟

皇上念切民依特事巡省恩波肆暨江海同沾而始也以河決不治患及吾民仰煩

聖慮夫治河誠國之大事也

臣

嘗稽之往古禹底九河

之績禹貢詳其文漢築宣房之宮作歌紀其事蓋篇籍所傳詠歌所述厥務亦綦重矣我

皇上仰符天道俯愜輿情盼睽之間指揮斯定已收數

十年不奏之功肇億萬載平成之績

聖謨廣運媿隆神禹而恩澤宏普恤民之災謀其生計  
憫民之乏免其正供有禹貢之所不能載者扈從諸臣  
宜備書方冊垂休奕禩矣若夫漢塞瓠子作宮其上  
是名宣房而作瓠子之歌章美其事載在漢書中臣以謂  
漢塞一決河耳且猶詠歌之我

皇上治河上下數千里至於江海之廣咸蒙

聖恩誠有非漢代之所能幾及萬一者而樂府不作其

何以闡揚盛美臣不揣固陋謹因臣部所奉

詔旨每撰一歌仰識

聖德神功於永永無極且以慶幸臣之榮遇焉至若寬

恤有司矜釋刑獄事下他部而臣所及知者亦謹併識

焉詞雖不文然其聲調頗取漢魏以來樂府夫樂府之

作皆以被之金石絲竹薦之朝廟用之家國非徒為文

字觀美而已今臣所撰雖不敢妄擬古之作者實欲俾

奕世知我

國家功德誠遠侔三代之隆斷非漢以來盛時所可比  
擬萬一於治定功成播

朝廷之美宣天地之和庶幾其義有取焉爾臣不任兢  
惕不任忻忭以聞

歲二月第一

頌奉

皇太后鑾輿時巡也

歲二月巡狩惟虞帝之則其始由岱宗順時布令德我  
皇握天樞舉事合經籍煌煌大業初



慈闈共夙昔及茲撫金甌九圍覩式廓晨昏在  
惟鑒玉顏正怡懌孝理通烝民歡心洽萬國

右歲二月十四句

平成第二

紀閼河也

平成際時雍

聖人肇興萬世功以仁為涵濡義為繩約禮為隄防智  
為疏鑿清河排決萬斛泥高堰水落蛟鼉移上下河海

吾

皇不來民其將焉如爰取其陳惠此貧者士女歌舞金堤下

右平成十四句

淮水清第三

迷留漕也

淮水清黃水波中有漕船過率三十鍾才致一石多淮揚水流滂沱水中人營巢居其能免乎為魚寒者待衣

饑者待舖留船漕二十萬石行者得休居者得食感

皇恩歌以易泣稼穡艱難一粒一珠

皇恩浩汗

右淮水清十九句

江南北第四

紀免江南北通賦也

江南北江茫茫吾

君恩澤江流與長江以南江以北頌洋洋緩新除舊賦

婦子偕樂康江天高高崇隆上天施雨露時乘駕六龍  
瞻雲而就日萬姓來邕邕視聽自我民民依與天通壽  
萬億年福祿同年年三月春風中

右江南北十九句

時和第五

紀免淮揚額賦也

時和景鴻長

聖人莅阼萬斯年恩膏溥流布我民一時違作息潤枯

甘雨澍盡賜舊年租新穀登場在旦暮曲體民生從來  
王道本人情仁且明愛民如此所以致昇平

右時和十三句

吳山第六

紀免浙江道賦也

吳山高越水長江流無波海不揚引領望幸慰我耕桑攀留  
鑾輿福我子婦復其民無有所與長吏安所事蒲鞭九  
年耕賜三年賦

右吳山十一句

海濱田第七

紀恤商也

海濱田川貢珍皎玉雪莽若雲民所重儼耕芸

聖澤隆瑞氣氤沛汪濊潤下土寬餘筵惠萬估靈露零  
錫嘉祐叙八政修九府醴殷殷爛揚光若農晦禾稼穰  
四時榮和衆芳

聖人出萬寶昌

右海濱田二十四句

江湖盤第八

述廣入學額也

江湖盤坡陀美哉磊犖而英多菁菁者我在中阿言采  
其芹于泮之沚芄芃棫樸薪爇是以奕奕龍光濟濟多  
士萬年以寧媚

天子

右江湖盤十句

淮南第九

紀免鳳陽額賦也

淮南涖渚混牛馬禾穠生耳卧原野秋穀在田中困簾  
蓋寡

帝南巡恩澤滂欲令里閭富蓄藏

天意豈獨私一方十行

詔下通雨暘不事金木占饑穰殺我婦子千倉萬箱祝

聖君萬壽昌



右淮南十四句

岱峰第十

紀免山東額賦并賜緩征道租也

岱峰觸雲根膏雨來天門自

皇之來矣解網賜生存天下民自以不冤自

皇之旋矣頻施除復恩岱峰峨峨肅然祥風乘朝曦播

神功周覽滄海

聖澤龐洪道光素王心傳魯東躋民仁壽中刑措銷兵戎

右岱峰十七句

於昭第十一

頌

天藻留題

聖書頌賜也

於昭惟天惟

聖皇盡覆下土臨萬方文思被格侔陶唐讀書萬卷摘  
天章倬哉雲漢神龍翔彤池灑墨江海光山川留題奕  
葉長從官拜賜羅

御牀賚及守土同巖廊舊臣何幸趨

帝傍驚迴鳳舞親攜將心依日月身江鄉我

皇文治洵煒煌輝映百彙皆蕃昌微臣奉職占農祥欲  
請未敢中傍徨作歌傳後示不忘

右於昭十七句

### 擊壤第十二

頌太平也

皇上創興鴻基連歲北伐率土臣服四方晏然猶復治

益求治宵旰不遑茲者

巡歷吳越凡所經過自守土之臣及四方靡不沾被

湛恩蠲租除賦赦過省刑太和之化洋溢萬國記曰心和形和則天地之和應之此作樂之本也

擊壤歌太平惟吾

君聖神萬里絕沙漠掃除妖氛安黎元尚慮疾苦壅上  
聞歲在木日營室

皇乃時巡供張不復煩吾民枯者以濡寒者以暄除租  
賦以裕其儲蓄方伯二千石復其爵秩俾謹身撫字子  
養有若父與昆蠲釋苛與煩囹圄之幽回春溫

天子實活我不知獄吏尊自充沿吳越愷澤流無垠路

無拾遺之夫卹商惠農時吏不呼門九歌既叙兮九叙  
惟歌九州懼愉兮九奏孔多億萬斯年兮舞蹈太和

右擊壤三十句

午亭文編卷一

欽定四庫全書

午亭文編卷二

大學士陳廷敬撰

樂府

遠遊篇

遠遊何所之乃在大海隅海波何澹澹雲氣何舒舒赤  
螭為我駕翠蚪為我驅神魚如山長電目邱松鬚綠髮  
兩仙童指引神所居飄緲白玉闕照耀黃金鋪珊瑚為

階砌木難為門樞星娥倚東廂微笑玉齒殊仙老三五  
人龐眉曳輕裾食我以瓊蕊遺我石函書書中何所云  
保汝千年軀永同金石固日月齊靈符下視人間世榮  
華真斯須

白馬篇

白馬驕秋霜銀鞍照路傍黃金為馬銜珊瑚為劍裝被  
服閑且都雜以綺羅香交遊競意氣俯仰垂榮光長兄  
二千石小弟侍中郎身冠羽林籍名艷關雞場要間烏



號弓右發左挽強一縱連兩禽鳴鏑隨低昂歸來道狹  
邪緩帶傾華觴猗嗟陽阿舞迭奏邯鄲倡為樂苦不極  
紅顏坐凋傷

關山月

峰冷天山色霜明瀚海流  
關弓抱影度隴劍橫秋  
玉笛三更夢金閨萬里愁  
龍堆看夜夜長歎上邊樓

陌上桑

曉日渭橋東行人春思中  
桑間秦樓女綠映顏花紅  
玉

金文四八卷二  
釧低枝露香羅隔葉風蠶饑正歸去五馬立烟空

班婕妤

顏色春桃李東風寧久留昭陽飛燕寵長信婕妤愁玉  
階惟見月團扇已驚秋試問承恩者常懷哀謝憂

明妃怨

千古蛾眉意丹青畫不成生綃空有恨披寢本無情紅  
淚邊花色朱絃磧雁聲那堪孤塚月還照漢時營

銅雀臺

昔時銅雀伎曾薦綺羅香遺恨千秋令雄心六尺牀舞  
餘金鳳冷望極玉蛾長日暮西陵道悲風生濁漳

折楊柳二首

樓下與君別柳條初覆肩柳今與樓長搖曳金窓煙春  
暗黃龍塞花明黑水川含情忍攀折遠寄東風前

楊柳三春樹年年別恨長曲中官渡月枝上塞門霜紅  
粉倡園色黃沙劍客妝金鞭不可贈攀折暮情傷

山鷓鴣

何處鷓鴣飛湘江斑竹枝夕煙人影外斜日客行時斷  
續虞妃淚蒼黃屈子辭更聞賈太傅鵬鳥賦深悲

猗蘭操

猗猗其蘭迺在空谷我行四野奚處奚宿其蘭猗猗幽  
幽其香雜彼薜蘿我心相羊蘭其如何維霜及霰時節  
晚暮不我能見子不我見我心則夷悠哉以老樂天弗  
疑

將歸操

河之水湯湯我欲濟兮川無梁豈繫川無梁我褰我裳  
河之水悠悠我欲濟兮波無舟豈繫波無舟我曳我裾  
我裳我裾不可以濡兮吾將焉求

雉朝飛操

雉夜兩兩朝雙飛雄者氣盈挾其雌雌欲啄雄欲飛雌  
不敢以東西彼獨何者羣遊中野雉子斑奏鳴絃羈孤  
向人生自憐

梁父吟

金史卷一百一十五  
卷二  
我歌梁父吟慨慷誰與陳君不見公旦巧能世絕倫吐  
哺握髮衆士親噉噉赤烏下白屋後來豈有如公人君  
不見吹簫販繒士所羞得時睥睨輕儒流賈生歎鵬陸  
生老刀筆之吏為通侯

烏夜啼

寒夜夜長夜不明五更盼斷霜禽聲紅顏易歇綠窓裏  
塞鴻欲度林鷗起金井雙桐露葉低秋閨月落玉闌西  
年年為伴相思老莫向高樓別處啼

冉冉孤生竹

冉冉孤生竹，今為薊邱篁。  
地寒出不高，枝葉稀飄揚。  
不恨枝葉稀，三冬被嚴霜。  
豈無雨露滋，時至則萎黃。  
託根失處所，撫心多慨傷。

幽澗泉

白石爛爛流，泉深松風寂。  
歷吹素琴山，窓明月弔孤影。  
別來五度秋，援吟援吟人。  
不歸怨鶴空，山飛泉水波。  
木葉稀，緝商綴羽張，急徽。

北邙行

洛陽城北山峨峨城中人少山墓多白鳥半夜啄大屋  
青燐當晝燔陵谷自經喪亂墓無主野田髑髏悲自語  
寒食誰家送紙錢魂孤眼望愁鴟鳶客來遊眺蒼茫裏  
東見虎牢西熊耳山川酹酒一高歌光武陵邊杏最美  
君子有所思行

生民皇古前心志自澹泊迨彼喜怒煩憂患抵中惡聖  
人急其病道和揅以藥作樂反性初緣情禮乃託悠哉



咸韶音風淳合冥漠絙桐通神明截竹諧葦簫千秋鳳  
一鳴四海皆安樂

艾如張

艾而張羅旌門蕭蕭馬鳴獸嗥于田非好殺取足盈大  
庖白露下來麋鹿始交鹿有匹兮山有羅吹聲象匹鹿  
奈何

芳樹

芳樹長搖搖四邊多烈風黃鵠在其上養子芳樹中寒

影濯清露羽毛亦不豐託身寧非高心欲陵蒼穹迴頭  
謂芳樹勿作風中蓬大者拔本根小能傷青葱稀枝魚  
落葉與子分西東芳樹謝黃鵠此言何愚蒙風來無時  
休將吾誰適從汝自慎身口大造無全功黃鵠舉翅飛  
攜子躡雲蹤後來見芳樹低摧橫煙空

種葛篇

鬱鬱南山葛離離東井瓜本自不同生兔絲緣女蘿葛  
藟亦已長瓜蔓亦已多霜天各刈除棄捐于中阿種瓜

瓜有種種葛有芽瓜葛相結連我心則匪他拳拳執  
明信歲寒夫如何

蒲生行浮萍篇

浮萍東西流離離青蒲間小年事君子不知心所歡錦  
衾生恐慄半臂承夜寒恪勤在婦道冰雪灑肺肝霜天  
弄機杼繰絲織纈充君下體服自顧衣裳單米鹽碎  
小務家室粗以完慙慙三十載一日無歡顏容色不再  
好罪尤誠有端故人足可棄新人亦可憐人誰不娶婦

君家婦良難新人不待故聞聲發永歎蒲生何離襍浮萍何汎瀾此曲不可竟曲竟增悲酸

蒿里行

青青松柏原鬱鬱古蒿里留待市朝人容華謝桃李桃李春光搖曳時東風未老已先悲蟲蝕葉雨摧枝成陰結子難豫知人生朝露日易晞滿堂歡笑翻涕洟言駕幽山去親戚相攀追遺君舊劍佩卷君舊羅幃清酒安可酌餘閣空盈卮狐兔夜深語賓朋四散歸各各有一

日不必相歔歔萬里路遠在百年近旦暮生時不自縱  
意樂坐見春花委芳樹

隴頭吟

生不願為隴頭客亦不願聞隴水聲隴頭作客腸應斷  
隴水聲多帶別情別情未已紅顏老北流是向龍城道  
一箭烽傳瀚海雲三時馬絕交河草隴坂回看隴樹春  
隴關四外戰塵昏行人莫作隴頭客從此邊心不可論  
豫章行

秋風吹白楊搖搖豫章山落葉辭本根隨風不復還男  
兒遠別離戚戚成頽顏跳丸有迅晷逝波無停川生短  
嗟世長何況寡所歡賢聖齊窮達流坎天命然委順全  
遠節去日難重攀介福自己求鬢髮誰令斑

猛虎行

朝從猛虎食暮從野雀棲野雀無定端猛虎還苦饑水  
濁不見底水清石纍纍清濁各有以溝水流東西天風  
吹海色昏昏渺無涯遊心三神山百年曾幾時

長歌行

鰕鮒細小蟲生長潢潦間  
燕雀自儕侶寄命于柴藩  
豈知六月鵬高翅摩雲天  
潛鱗濯鬣鬣游戲于深淵  
物生各有分吾終慕羲軒

空城雀

鴻鵠翔寥廓鷦鷯聲啾啾  
翩翩嗟汝雀嗷嗷云何求  
回顧黃口兒常有羅網憂  
烏鳶各異態爪觜每見投  
摧頽太倉粟口腹身所仇  
物生有天命知此絕禍尤

節雁行

史館僚友語近事

羅者獲雄雁雁活翎翅全置之樊籠中哀鳴欲有宣每  
當秋春時塞雁來翩翩顧步忍長繫飲啄苟自存賴彼  
牧豎兒臥眠兩踰年其秋其雌來聞聲於九天夜半翔  
而下悲吟何闕闕以頸投籠中咽吭交相纏晨起人眠  
之雁則雙死焉適予在史館有官屯民田屯夫既來告  
官因為予言風檐展書坐雁唳過前軒聽者盡訝歎終  
朝掩遺編思用厲堅操作此節雁篇



東海頭

東海頭古來白骨成荒丘  
天生海水向東注日出月沒  
滄波流嗟我人民何用相讐  
東海頭長城起秦人築怨  
海水深不見長城見海水

堠傍路

堠傍路日日征人從此去  
古人行盡今人行春草春花  
只如故莫言今人與古人  
昨日車輪疊馬蹄寒風一夜  
吹何處

雁門行

雁門關雁不度關上長城高插天鴻雁高飛從此去雁  
飛長城間遊子關門還雁南君北向相望何由扳塞山  
連絲秋雲起西度五原東遼水傳語幽并輕俠兒雄飛  
雌伏休相疑

饑鳥行

北風吹樹樹怒呼深枝饑啄雙老鳥身微願違心羈孤  
野日凍雪霜蓬枯天寒夜昏何時旦黃鵠單飛淚如綫

鳴雁行

鴻雁鳴度雁門風霜慘慄羽翮存養子俱高飛中有斷  
雁陵雲翻渺然獨宿沙磧間江湖適遠伴侶非稻梁雖  
多身不肥羈孤畏人行色微心志皎潔衆雁知君有矰  
繳慎莫施彈射孤鳥古所悲

門有萬里客

門有萬里客落日照顏色問客適何鄉未言先歎息生  
長西蜀人故里多荆棘荆棘不可居虎豹嗥相索離鄉

客四野席草蔭松柏草長茵以厚松柏上鬱錯不虞幕  
府書催令還鄉陌鄉陌不可居竟言雙淚落

白鳩篇

古之紀官或以四時或以雲其於物或以龍鳥至於  
鳩蓋鳥之一耳而以名官左氏郕子曰祝鳩氏司徒  
鵙鳩氏司馬鵙鳩氏司空爽鳩氏司寇鵙鳩氏司事  
鳩亦異於凡為鳥者哉余有感焉作白鳩篇亦古詩  
遺意也

拂舞歌白鳧吳歌且吳舞感此清商音淚下不能語亦  
有白鳩辭新聲翻舊譜白鳩之白性安馴其子雖七思  
平均食之朝上暮自下鳥有如此義且仁丹山鳳皇五  
色文身將九子凌青旻豈惟九子身自將百鳥不間疎  
與親嗚呼鳳德殊絕倫白鳩一遇三千春

午亭文編卷二